

AKASHVANI AIZAWL
REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma'n Mizoram in Corporate Social Responsibility hmang thei Registered Agency a ngah loh avangin tun thlengin Mizoram chu India rama CSR fund dawng tlem ber state a ni mek a ti.
- 2. Home Minister Pu K.Sapdanga'n Mizoram Police ten tha zawka hna an thawh theih nan chhan hrang hrang vanga hna thawk thei lote chu voluntary retirement emaw special retirement scheme emaw hmanga chawl turin a chah.
- 3. Vawiin khan National Statistics Day vawi 19-na Mizoram hmun hrang hrangah hman a ni.
- 4. Khawvela Journalism chawimawina ropui nizana New York-a semchhuah Emmy Awards dawngtu team zingah Akashvani Aizawl News Editor pahnih an tel.

<><><>

CM :

Chief Minister Pu Lalduhoma'n Mizoram in Corporate Social Responsibility hmang thei Registered Agency a ngah loh avangin tun thlengin Mizoram chu India rama CSR fund dawng tlem ber state a ni mek a ti.

Vawiina Mizoram CSR Cell leh Confederation of Indian Industry (CII) te tangkawpin ni thum chung awh Capacity Building Workshop for an buatsaih kharna hun a hmanpuinaah he thu hi sawiin Chief Minister India ramah CSR fund tam tak hai luh tur a awm a ti a, CSR fund chu a kum telin a pung tual tual a, Fund hmang tangkai tur hian kalphung fel tak a awm a, Mizoramah chuan Dan ang thlapa CSR fund dil thei leh hmang thei pali/panga vel an awm tawh a, hna an thawk nasain an tangkai hle a ti a. CSR hnuaiah thilpek tesep mai ni lovin sum hlawm lian tak tak hmanga ram tana chhenfakawm tham kalpui theih a ni tih sawiin, chutianga ti thei, NGO, Society leh Agency Mizoramin a ngah phawt chuan an hai lut thei tawh dawn tih a sawi a ni.

Byte : Chief Minister

Chief Minister chuan CSR lama Mizoram hnufualna tihreh dan dap thaa a hriat avangin Chief Minister Office-ah CSR Cell an din a, chairman-ah Adviser to CM, Pu TBC Lalvenchhunga an ruat a, a tir phat atangin hma an la tha nghal hle a ti.

<><><>

LUNGLEI POLYTECHNIC

Mizorama Diploma Engineer zir theihna hmasak ber Mizoram Polytechnic Lunglei Building chu a tum hnih nan court thuchhuak angin vawiin khan kalh leh a ni,

Lunglei Dist Civil Judge Pi Lalthansiami Hnamte chuan building kalhna tur thupek hi a chhuah hnuah vawiin khan Lunglei Police ten Main building, Science Block, Seminar Hall & Library, Fitting & Pumbling shop, Workshop, Farm House leh Store Room te an kalh a ni.

Kan corr sawi danin Polytechnic ah hian zirna kalpui a la ni rih lova, thla thar ni 9 a kai tan tur an ni a, Polytechnic staff te hian Principal Room-ah meeting neiin Building kalh tur hi hriattirna an dawn thu leh harsatna hi chinfel theih nise an duhthu an sawi a, Police ten Building an kalh lai hian harsatna engmah a thleng lo a ni.

Mizoram Polytechnic Lunglei hi hun rei tawh tak atanga an ram neitu Pu Vanlaldawngliana Theiri at hnena luahman pek a nih loh avangin court ah a khing a, nikum Nov 7 khan court chuan Mizoram Polytechnic building zawng zawng khar sak turin thupêk a lo chhuah tawh a ni. Khami tuma kalh a nih loh chhan chu zirlai ten exam an hmachhawn avang leh court sang zawk Supreme Court-a thlen tum a nih thu dawn vang a ni a, tunah hian huntiam chung ni 90 hnuah pawh sorkarin ram hawh man a pek theih loh vang leh Court sang zawk atanga thu engmah an hmuh loh avangin kalh sak an ni leh ta a ni.

Mizoram Polytechnic Building luahman sorkarin a bat hi cheng Nuai 88 sing 1 & 3,268 a chhut a ni.

<><><>

MIZORAM POLICE REORGANISATION :

Home Minister Pu K.Sapdanga'n Mizoram Police ten tha zawka hna an thawh theih nan chhan hrang hrang vanga hna thawk thei lote chu voluntary retirement emaw special retirement scheme emaw hmanga chawl turin a chah.

Vawiin Aizawla Mizoram Police Headquarters-a hun a hmanaah he thu hi sawiin Home Minister chuan kum 1 leh a chanve chung Mizoram Police chhungkuaah a tel ve tawh chhungin Police officer zawng zawngte inpekna leh phurna te a hmu a, hetihlai hian Mizoram Police ten tha zawka hna an thawh theih nan, insiamthatna tur hrang hrang a awm tih sawiin, Police thenkhat accident leh thil dang vanga hnathawk thei lote an awm a, heng mite hi voluntary retirement la turin a chah a, voluntary retirement ti thei lo te chu special retirement scheme zawm ve turin a chah a, tha zawka hnathawh a nih theih nan Gazetted Officer zawng zawngte chuan Zero based posting system an hmang tur a ni a ti.

Byte: Home Minister Pu K.Sapdanga

Home Minister chuan Mizoram Police post sing 1, sang 2, 228 a awm a, chung zinga zaa 61.7 chu hnawhkhah tawh a ni a, post zaa 38.9 a la ruak mek tih a sawi a ni. Tunhnai hian mi 259 an lakluh belh a, training an zawhfel hunah Mizoram Police awm zat chu a pung dawn a ni a ti.

Home Minister chuan sorkar laipuiin Mizoram tan MRHG volunteer post 1, 260 a pe a, tun dinhmunah post 1,168 hnawh khah niin post 92 ruak hnawh khat turin Mizoram sorkar ngen a tul tih a sawi bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



NATIONAL STATISTICS DAY

Adviser to CM Pu TBC Lalvenchhunga’n loneitute leh kuthnathawktute tharchhuah chungchangah te, state pawna bungraw thawn chhuah leh chawk luh kawngah te market thleng phak nei thei turin data collection lamah hmalak tha a tih thu a sawi.

Vawiina Directorate of Economics & Statistics buatsaih National Statistics Day vawi 19-na, Economics & Statistics Conference Hall, MINECO-a a hmanpuinaah Aizawl West I bialtu MLA ni bawk, Adviser to CM Pu TBC Lalvenchhunga chuan state pawna bungraw thawn chhuah leh chawk luh kawngah kuthnathawktuten hlawkna an hmuh tam theih nan felfai taka chhinchhiah bakah mumal zawka thawnychhuah a pawimawh a ti a, Economics & Statistics department hmalakna hnuaia data collection leh sample survey hmangin thu dik behchhan tur a awm avangin tan huai a awl a, tihsual pawhin siamthat dan tur a ti awlsam a ti a, hemi kawngah hian department te pawh thuam chak an ngai tih a sawi bawk.

Pu TBC Lalvenchhunga chuan thil man danglam dan te chu hmun khatah luangkawm thei se chuan tun aiin data rintlak leh tehfung mumal zawk an neih theih a rin thu a sawi a, loneitute leh kuthnathawktute tharchhuah chungchangah te, state pawna bungraw thawn chhuah leh chawk luh kawngah te market thleng phak nei thei turin hmalak tha a tih thu a sawi a ni.

Byte: TBC Lalvenchhunga

National Statistics Day hi District hrang hrangah uar taka hman a ni bawk a ni.



EMMY AWARDS

Khawvela Journalism chawimawina ropui nizana semchhuah Emmy Awards dawngtu team zingah Akashvani Aizawl News Editor pahnih an tel.

BBC team-a Mizo hming lang pahnih hi Mizo journalist, AIR Editor pahnih HC Vanlalruata leh Isaac Zoramsanga te an ni a, National Academy of Television Arts & Sciences (NATAS)-in News & Documentary Emmy Awards, vawi 46-na a buatsaihah – Short Form category-ah award an dawng a, New York City Palladium Times Squareatanga sem chhuah Emmy Awards ah hian, 'Myanmar’s Civil War' tih thupui hmanga BBC in an buatsaih short-form documentary –chuan Outstanding Continuing News Coverage an dawng a ni.

AIR Editor Pu HC Vanlalruata chuan Lawmman an dawng chu an beisei phak bak anih thu sawiin an lawm takzet tih a sawi.

Byte: HC Vanlalruata

AIR Editor Isaac Zoramsanga pawhin Lawmman an dawn chu an rinloh lam daih anih thu sawiin anmahni lawmpui tute chungah a lawmthu a sawi a ni.

Byte: Isaac Zoramsanga

Mizo journalist pahnihte hi BBC tana project-ah hian field producer hna an thawk a, Myanmar chhim lam Chin State-a ni 10 chhung reporting mission an neih chhungin, ground-level support pawimawh tak tak an thawk a. An hnathawh hian BBC team-in hmun ril leh thuk zawk, hnam sipai leh Myanmar sipai junta-te inkahna hmunte, hnam sipai inbunna hmunte an luhchilh theih phah a ni.

Minute 6.5-a rei documentary hian tualchhung hnam sipai pawlte'n hmun eng emaw zat atanga sipaite an hnawhchhuah dan a entir a. Chutih rualin, junta-in hnam sipai pawl tihtawp leh thalaite ralthuam hmanga an tihduhdahna, rukbo leh thah chungchanga report lungchhiatthlak tak takte pawh a pholang bawk.

Chief Minister Pu Lalduhoma chuan social media kaltlangin lawmpuina a hlan a, Regional News Unit-a Assistant Director Pu Gin Gangte an Editor pahnihte a lawmpui thu sawiin Editor chhuanawm tak an nei chu AIR tan vanneihthlak atih thu a sawi bawk.

<><><>